



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim

tiryimyim@aolima

tir yimyim

TAPAK 6

ODI rankings: Virat Kohli top-five-i iogo

Meghalaya nung TMC tanishir Mamata-i nübortem ayongzük



VOL. XX NO. 97 (ADOK 97) DIMAPUR

YANGTEPNÜ (THURSDAY)

ANEJETI (JANUARY) 19, 2023

₹ 5.00

Naga yimten melateti election magitsüla: NPAC NPF-i election nung tokteptsüsa akümtsü

Kohima, January 18, 2023 (TYO): Election Commission of India (ECI)-i Naga yimten melateti February 27 nü assembly election agitsü sangoktsüba nübortem aser telok balalai temulung ajungai magizüker.

"Onoki election masü saka yimten latetsü atema inyaka arur. Election agitsü osang sangokjaka India sorkar dang Naga yimten latetsü tashi lir" ta Nagaland Peoples' Action Committee (NPAC) convenor Theja Therieh-i ashi.

"India sorkari tiyongsü nung aita Election Commission-i inyaka aotsü o ashitsüla" ta pai ashi.

NPAC-i January 14 mokdang ayongba thinenbaji January 17 nü Naga kin teloktem tongtipang senden ka amentsü aliba atema liasü. Ajisüaka iba senden nung lemtet agiba ajanga maparen inyaka aruba nung tetsükdaktsü ajuruogo, ta pai metetdaktsü.

Naga nungeri election masü yimten lattetsü aginür, anungji kin 8-i iba mapa ya maneni inyaka aotsüla ta Theja Therieh-isa ashi.

NPAC mesüra Nagaland Tribes Council süang onoki kin 8 hohotem den külemi yariteptsü aser parnoki NTC maginüra Naga nungeri tongti telok ka tentetsü akok, ta paisa shisem.

"Parnoki tangar nem meinyakdaktsünür saka parnoki tejakleni marur, iba atema sasar. Kin 8 hohotem iba tongtipang mapang nung telemtetba tajung ka agitsüla, mesüra Naga nungeri ano maongka ka süidaktsütsü,

kechiyong India sorkari Naga teloktemi renema lir yimten latetsü mulunga lir ta shiogo" ta Therieh-isa metetdaktsü.

"Ita ka shi lia elections agitsü sangoktsüba atema NMA-i Naga yimjung maparen atema tebilemetsü abener" ta Naga Mothers' Association (NMA) advisor Rosemary Dzüvichü-i ashi.

India sorkari Naga nungeri temetentem aser putiotsü akhümtsüba yimten latetsüla. Taruba hopta ishika tsüngda Centre sorkari Naga nungeri atema yimjung aginür asü masü sayutsü" ta lai ashi.

"India sorkari yimten latetsü atema election ta ashir saka iba ya tamagitsü olen ka kümogo. India sorkari parnoki sünütsü dang asür" ta Naga Hoho (organisation) general secretary K. Elu Ndang-ia ashi.

Centre sorkari nübortem ola angatsü amadokogo aser parnok sasa dang telemtetba agir, ta paisa ashi.

"Northeast nung regional political party tejentiba NPF-i Naga yimten latetsü atema tongti süa inyaker aser maneni inyaktsü" ta Naga People's Front (NPF) secretary general Achumbemo Kikon-ia ashi.

Ajisüaka, Election Commission-i election agitsü sangoktsüogo anungji registered political party ka ama NPF-i election nung tokteptsü aser iba atema renema lir, ta pai metetdaktsü.

ECI-i election agitsü sangdongba atema mepelar: Congress

Dimapur, January 18, 2023 (TYO): Election Commission of India (ECI)-i Nagaland assembly election anogo metetdaktsüba atema jashir kechiyong iba ajanga nübortem taginüba ashioktüsügo ta Congress-i ashi.

"Tripura aser Meghalaya nung election anogotem indang osang metetdakjaka, Nagaland nung election thinenba osang ang ashitsü akok ta Naga nungeri imlaa liasü. Centre-i agreed political solution mapa inyaktsü atema election thinentüsü akok ta bilem saka ECI-i Nagaland assembly election osang sangoktsü" ta Congress Bhavan nung Congress president K Therie-i ashi.

"Nübortem Naga yimten latetsü atema kanga yongyaa ataba mapang ka nung election agitsü osang ang sangoktsüba ajanga nübortem aoksar. Congress-i election nung tokteptsü aser Nagaland tarutsü kümzüka ayutsü atema takok angutsü mulunga lir. Onoki nübortem nem temeten agütsünür" ta pai ashi.

Nagaland MLA temi yimten latetdaktsünür ta shia arur saka parnoki iba atema lenmang melapoktsü mesüra MLA

menden meyutsü, ta Therie-isa ashi.

"Parnok ajak ya nisung ashioktürtem lir aser ibala nisungtemi Nagaland sorkar ketdangsuba nung nübortem temeten kecha mangutsü. Anungji tang ya Nagaland nung alirtemi telemtetba takang ka agitsüba mapang lir" ta paisa metetdaktsü.

"Nagaland nung aliba civil societies-i agreed political solution mapa tenzüknüba shiogo saka Centre sorkar aser Nagaland nung opposition maliba sorkari asenok taginüba mangateter. BJP aser Opposition maliba sorkari Nagaland nung alirtemi atema kecha mebilemer" ta NPCC president-isa ashi.

Nagaland nung tanga lenmangji Congress dang lir anungji nisungtemi sorkar melentsü atema bilemetsü mepishir. Nagaland nung alirtemi tenük yoktsüla aser Nagaland tarutsü atema telemtetbatem agitsüla, ta Therie-isa metetdaktsü.

"Nagaland nung kasa tangatetba aliba political party tem den secular front ka tentetsü atema jembitepdar aser onoki menden ajak nung tokteptsü atema inyaktsü" ta paisa ashi.

ECI-i Meghalaya, Nagaland & Tripura elections anogo metetdaktsüogo



Schedule for GE to Legislative Assemblies of Nagaland, Meghalaya & Tripura- 2023

| Poll Events | Tripura Single Phase (All 60ACs) | Meghalaya & Nagaland Single Phase (All 60ACs of both states) |
|---|----------------------------------|--|
| Date of Issue of Gazette Notification | January 21, 2023 (Saturday) | January 31, 2023 (Tuesday) |
| Last Date of Making Nominations | January 30, 2023 (Monday) | February 7, 2023 (Tuesday) |
| Date for Scrutiny of nominations | January 31, 2023 (Tuesday) | February 8, 2023 (Wednesday) |
| Last Date for Withdrawal of Candidatures | February 2, 2023 (Thursday) | February 10, 2023 (Friday) |
| Date of Poll | February 16, 2023 (Thursday) | February 27, 2023 (Monday) |
| Date of Counting | March 2, 2023 (Thursday) | March 2, 2023 (Thursday) |
| Date before which election shall be completed | March 4, 2023 (Saturday) | March 4, 2023 (Saturday) |

Guwahati, January 18, 2023 (Agencies): Election Commission of India (ECI)-i Northeast state asem-Meghalaya, Nagaland aser Tripura nung assembly elections agitsü anogotem metetdaktsüogo.

Meghalaya aser Nagaland nung February 27, 2023 nü assembly elections agitsü. Külén, February 16 nü Tripura assembly elections agitsü.

Iba sülen March 2, 2023 nü Northeast state asem indang

votes azüngtsü.

"Northeast state asem (Meghalaya, Nagaland, Tripura) nung vote enoktsür lakh 62.8 tema lir. Parnok rongnung tetsür lakh 31.47 dena lir, arishi küm 80 tempur 97,000 aser PwD voters 31,700 lir" ta Chief Election Commissioner Rajiv Kumar-i ashi.

"Northeast state asem nung tang mezüng atema vote enoktsür lakh 1.76 lir" ta paisa ashi.

Nagaland indang legislative assembly kümsük March 12,

2023, Meghalaya indang kümsük March 15, 2023 aser Tripura indang kümsük March 22 nü tembangtsü.

"January 11-15, 2023 tashi ECI-i Meghalaya, Nagaland aser Tripura semdangogo aser sendentem menogo. Onokisa political party tem den ajurutepogo aser parnoki pei pei state dak sendakba tebilemetsü lemsatepba angaogo. State shia nung nüngdakba ama onoki maparen inyakogo" ta Rajiv Kumar-isa ashi.

Banuo Z. Jamir-i Nagaland Lokayukta inyaker

Dimapur, January 18, 2023 (TYO): Nagaland nung taoba Chief Secretary Banuo Z. Jamir-i Lokayukta inyaktsü atema tezüngzüktep agiogo.

January 18, 2023 nü Conference Hall, Nagaland Civil Secretariat, Kohima nung sentong ka nung lai tezüngzüktep agia liasü.

Iba sentong nung Home Commissioner, Abhijit Sinha, IAS menden liasü aser Chief Secretary, J. Alam, IAS-i tezüngzüktep agidaktsü.

AKM 69 buba inti mungdang meraketa tenzüko

Akhoya, January (TYO): Ao Kaketshir Mungdang 69 buba Inti Mungdang January 18 aonung Housing & Mechanical Government Minister Tongpang Ozüküm-i Akhoya yimdak meraketa lapoktsüogo.

Pai iba sentong nung jembidang, AKM tenzüker küm 94 buba arur aser kobi meli-i küm noklang ajungtsü, anungji iba tashi nungbo Ao Milen ya tang dang nungi jenjang tajungba nung adoktsü merangtsüla, kechiyong iba ya osang kaket ka dangbo masü, iba ya Aor nem sangwa yaloktsüba milen lir ta ashi.

"Iba den ano Mokokchung Law College ya sorkari magiakasa, tang aliba jenjang dang nungi tajungba kümdaktsütsü merangtsüla. Iba college AKM-i achayanga aser Aor ajaki shilem agia tenzüka ka lir, anungji AKM centenary amungdangbo ibai tetsüng tenteter pei sasa noktaketba college ka sütetsü nükla ayutsü ayongzük" ta Minister Tongpang-i ashi.

Ao literature committee tenzüker joko küm talangka arur,

iba tetsüngda nung Ao Senden Literature Board-i meranga inyakba ajanga taküm nungi Fazl Ali College nung Ao subject honour agi tenzüksü, aser tang ang Ao Academy tenzüksü jembitepba mapang lir. Ao kaketkeno aser oshiohen tejakleni aotsü asoshi inyaktsüla aser AKM centenary amungdangbo Ao Subject nung Post Graduate & Ph.D jenjang tongtetsüsa nükla ayutsüla. Ano, FAC nung dang masü saka Kohima aser Dimapur nunga Ao subject züngtetsüsa merangtsüla, ta paisa ajungshi.

Minister Tongpang-i AKM menden atsüngtepbayim melenshidaktsünüba ka ashidang "tzükong shia yimli agütsütepa ketdangpur shimba nung ya tajunga lir aser tashimaita lir, anungji tangar den liromedema AKM menden ya-a federal yayim nung ao nung koda jungla, aser iba inyakyim ajanga ketdangpur shimba maparen nung tetsükdaktsü kangabo majurutsü aser iba ajanga tetemsü nübu shimtsü lenmang lir" ta ashi.

Naga nungeri rongnung Ao kin nem mezüng Tsüngremi

maongka agütsü, maongka agütsüba nungji khureta densema lir, iyongji asen tsüraburi aji angateta tamang yimsü den shisaliok sayu. Iba süngjang tanü asenoki agir. Saka asenok taoba konang nung dang ameter melili, yangji dang azüiter kazüra asenoki tangar memeneptsü, anungji, taoba mapang asen tsüraburtem wangshiba aser merenba amaji lanurtemi ibaji khen Tsüngrem dang maongka meshitsüla ta paisa ayongzük.

Iba mungdang ya nisung tasen metettepba aser pelatepba mapang ka dang masü, saka nübu aser rongsen intokba amaji tajangzük akaba mungdang ka süidaktsütsü asoshi Minister Tongpang-isa kaketshirtem ayongzük.

Iba sentong nung Industries & Commerce, Labour and Employment, Skill Development and Entrepreneurship Advisor Imnatiba-i tayongzükba o jembi aser Central Nagaland Students' Association tir R. Sunep Pongen ajanga salem osang lemsatepba liasü.

Nagaland kübok tesem balala nung Netaji Subhash Chandra Bose asoba anogumung amung



Dimapur, Aenjeti/January 18 (TYO): Netaji Subhash Chandra Bose sor küm 126 ajungba anogumung den repsema 75 Azadi Ka Amrit Mahotsav nung shilem ka ama Phek district kübok Chesezu yimtsüng nung sentong ka January 18 nü agiogo. Iba sentong nung Deputy Commissioner Phek, Kumar Ramnikant, IAS alaketa jaoker liasü.

Kumar Ramnikant-i ashiba agi, linük nüjiso atema raraba mapang Netaji ya Chesezu-i aru. Netaji mapang linük ya British yimsüsüba kübok kanga timtema liasü. Netaji tesayuba aser pai nürburtem ajungmesoba ngushiba ya Chesezu asoshi kanga tia taka. Paisa, Bose ya arishi küm 21 asüandang Civil Service atema qualify sür liasü saka pai British nung kübok inyaksü atema memulung aser ochi mashi inyakyim den hai haura maka, ta ashi.

DC-isa, Chesezu nungertem dang Bose indang kerak yanglu kanga junga anepalua ayutsü ayongzükba den district administration-ia takokba tashi inyaksü ta ashi. Chesezu ya alima map nung lir kechiyong Netaji iba yimtsüng nung anenzük, ta pai ashi. Maneni DC-i yimdaklirtem dang taruba election merekmereka agitsü ayongzük, kechiyong parnok khuret tulu lir aser Chesezu yimtsüng ya model yimtsüng ka asütsüla, ta ashi.

Sentong nungsa Tourism Director Keduosie-u M Rio-i, Netaji Subhash Chandra Bose

(Ministry of Tourism, Government of India-i senotsü teyari agüja Department of Tourism, Government of Nagaland-i yangluba) indang Watch Tower semzükja liasü.

Vezo Swuro, shiba Netaji Subhash Chandra Bose den kanga junga sendaktepa liasü, pa-a iba sentong nung dena liasü aser DC-i pa nem tetushi agütsü.

Sentong nung Chesezu Village Council Chairman-i lokti pela agizükba o jembi, Phek Deputy Commissioner-i linük wako salatsü, linük naklo ken atemba, Chesezu nungertemi sobaliba saya balala sayaba, Chetheba Town Baptist Church Sunday school tanurtemi Netaji nem tetushi agütsüba amala sentong balala agia liasü. Iba sentong ya Extra Assistant Commissioner, Chetheba Nyamok N. Konyak lenisüba nung agi aser EAC Chozuba-i tepela o jembia liasü.

Kasa mapang nung Ruzazho yimtsüng nunga Netaji Subhash Chandra Bose sor küm 126 ajungba anogumung mungogo. Iba sentong nung Maj Gen. Vikas Lakhera, SM, Inspector General of Assam Rifles (North) alaketa jaoker liasü.

Lakhera-i ashiba agi, Netaji-i 1944 küm Ruzazho semdang aser ibayongji iba yimtsüng ya Nagaland aser India puti otsü nung kanga tongtibang kümogo. Lakhera-isa, Nagaland nung Netaji Memorial Development ya nürburtem asoshi lir, ta ashi.

Sentong nung Cekrolhu Swuro-i (living witness of

Netaji) balloon tem chioka liasü. Sentong nungsa Ruzazho Village Council Chairman Sesato Swuro-i lokti pela agizükba o jembi, Subhashji Subhashji- Jazz Band I AR aser Cultural Group temi shilem agi aser Extra Assistant Commissioner Nyamok N. Konyak-i tepela o jembia liasü.

Maneni January 18 nü Netaji Subhash Chandra Bose sor küm 126 ajungba aser Azadi Ka Amrit Mahotsav nung shilem ka ama National Cadet Corps (NCC), Nehru Yuva Kendra Sangathan (NYKS), National Service Scheme (NSS), aser Assam Rifles nungi volunteer 500 dak temai walkathon ka nung shilem agia liasü.

Iba walkathon sentong ya Home Commissioner Abhijit Sinha, IAS-i Indra Gandhi Stadium, Kohima nungi tenzükja liasü. O tatsüka jembiba mapang Sinha-i, walkathon ya Netaji Subhash Chandra Bose nem aküm tetushi agütsü atema ayongzükba lir ta ashi. Paisa, Alima rara tanabuba nung Netaji-i anir Indian National Army Nagaland nung aru anenzük aser pa Naga nungertem den tesendaktep tajung liasü, ta ashi.

Paisa, walkathon sentong ya Secretariat Plaza nung tembangsü kong wako 126 atsüketsü aser iba den painting aser drawing tetoktepa ka Capital Cultural Hall, Kohima nung agitsü, kong Kohima kübok school balala nungi kaketshir 126-i shilem agitsü ta metetdaksü.

NDPP Advisor T. N. Mannen-i party toktsüogo

Mokokchung, Aenjeti/January 18 (TYO): NDPP Advisor T. N. Mannen-i party toktsüogo. January 17 nü NDPP Mokokchung region tir nem resignation shiti agütsüba nung pai, Nationalist Democratic Progressive Party (NDPP) inyakyim achaayangba nung transparency aser consistency mali aser iba ya nisung kari dang party inyakyim ajak amokbanger inyakba ajanga lir, ta ashi.

Paisa, tetuyuba balala agütsüba metongshitsü asoshi jenjang tapet magi, koba ajanga constituency jenjang tashi nung ken o mejangjaba aika ajangshiba den tinyakertem mangmangteper. General Assembly Election atongtsü lia party nung inyakertem ajak ka dang aser party nung nia shilem ka ta bilemba ka party kübok inyakertemi majangshir, ta ashi.

Shiti nungsa January 17 nü Kubolong nung senyur kidang party ketdangpurtem, sanenluden züngsemtem aser

unit representatives ajak senden ka mena party ken o densema state nung yimden yimsüsüba indang sensaksemogo, ta shia lir. Senden nung NDPP party toktsütsü atema telemtetba agia liasü.

Senden nungsa taruba election atema lenir ka ama T. N. Mannen nem party tanga ka shimtsü aser ticket busitsü atema nonglokja liasü. Maneni shiti nungsa, iba tashi agütsüba dak ajemdaker pa pusemertem ajak den külemi BJP nung adentsü atema telemtetba agiogo, kechiyong lenla ajak nung terenlok asoshi constituency nung aliba nürburtem taginübaji aji liasü, ta ashi.

Maneni paisa, party nung inyakba mapang pa nongita yariba lenir aser party worker ajak dang kanga pelaba lemsatep. Pa NDPP nungi anenba sülen Mokokchung nung BJP Mokokchung district tir Imolemba Jamir matsüngdang party nung denogo.

Mokokchung DC & DEO-i senden ayonger

Dimapur, Aenjeti/January 18 (TYO): Deputy Commissioner & District Election Officer, Mokokchung, Shashank Pratap Singh, IAS-i sangdong ka ajanga, Mokokchung District kübok Magistrate/ In-charge Police personnel (FST/SST) team leader Expenditure Monitoring Cell ajak senden tanabuba den repsema training sentong January 20 nü DC Conference Hall, Mokokchung nung 11:00 ako nungi tenzükja

agitsü ta metetdaksüogo. Iba senden ya taruba Nagaland Legislative Assembly 2023 General Election atema asütsü.

DC & DEO, Mokokchung, Shashank Pratap Singh, IAS aser Superintendent of Police, Mokokchung, Manoj Kumar, IPS nati okila jembitsü aser training nung shisalen agütsürtemji Dhritishree Bordalai, MGNF, Aosanen, DLMT aser Lipoktoshi, DLMT nung asütsü.

Naga Club-i asükhu lemsatep

Dimapur, Aenjeti/January 18 (TYO): Naga Club-i sangdong ka ajanga, January 16 nü Dr. S. Imkong Tushi Ao (Naga Club Advisors) Zion Hospital, Dimapur Nagaland nung asüba osang angazüka kanga aoksaba lemsatepogo.

2018 küm November 29 nü Naga Club Centennial Jubilee mamung tsüngda Dr. S. Imkong Tushi Ao-i 2017 küm nungi Naga Club Team 5buba nung regularize masü tashi kanga yakyaka inyakogo. Iba mapang pa Advisors asütsü asoshi shim aser kasa mapa atema 2021-2024 tenure asoshi 6th Team of Naga Club ama shimshia liasü.

Dr. S. Imkong Tushi Ao ya Naga Club aser Naga nung alir ajak atema nükdang tajung ka liasü. Pa Nagaland State sorkar tenzükba mapang physician ka liasü aser iba sülena tintet rogo ka ama pai nisung aika dak kongshio.

Pa Indian Red Cross Society Nagaland (IRCSN) indang Vice Chairman aser Senior Citizens' Association Nagaland (SCAN) nung term ana tashi tir liasü. Kümtem tsüngda Dr. S. Imkong

Tushi Ao-i Indo-Naga tesendaktep indang süki ia agia liasü aser kidanger ama angatettepa alitsü nüngdakba lemsatepa aruogo.

Nagaland aser Assam na artsü ken o dak sendakba nung pai, tetsütebou mapang nungi Naga nung ali ajak meyipa agitsü, aibelen masütsüsa mekazütsü aser teti atema atsü atsüa kanga junga asadanga alitsü atema jembia aruogo.

Dr. S. Imkong Tushi Ao asüba ajanga Naga nung lokti nung tawa ka adokdaksüogo, koba süngdaksütsü asoshi tasak asütsü.

Onoki asür kinungertem den asükhu lemsateper.

Mangyimjashi tia nung alir ajak dang onok teti nenok den sarasadem ajanga sendaka lir aser nenok den kasa mang ayimer ta metetdaksüner. Tulusang Tsüngremi iba mangyim tejanshi khuret koktettsü atema nenok nem anisüngzük agüjang aser asür tanüla teti tatem makadak anisüngzükdakjang ta sarasademtsür, ta Naga Club tir Kuolachalie Seyie-i sangdong ka ajanga lemsatep.

Longsa yimdak BJP unit Bhavan lapokogo



Mokokchung, 18th JAN (TYO): BJP Longsa Unit Bhavan lapokba sentong Longsa yimdak Jan 18 nü takok ngua agiogo. 25 Mongoya kübok yimtsüng sasep nung BJP Bhavan lapokjibo ibai mezüngbuba asütsü ta osang ajanga metetdaksü.

Tanü iba sentong nung Mokokchung district BJP tir – Imolemba-i jembidang, BJP ya nükjidong tajung akaba party tajung ka lir aser India Prime Minister, Narendra Modi lenisüba kübok India nung

sensakertem jenjang ajungkettsür, education aser health sector nunga alima den lirumedema tesüngmangtsüka renlokdaki, ta metetdaksü.

Tanishir kar dak rangloker BJP nung züngsem kümra, tezüdangtsüka asütsü, anungji, nisung dak masü saka party nükjidong dak rangloker BJP nung adentsü asoshi paisa ajungshia liasü.

'BJP party ya Khristan yimsü anemer party ta aikati jembir, saka aji tai, BJP-i yamaji inyakra, onoki anir noktaksü

aser yamaji kodanga mesüdaksütsü', ta Mokokchung district BJP tirisa jangjashitsü.

Iba sentong nung Mandal In-charge – Bendangtoshi, District Executive Convener – Ojenlepzük, Mandal President – Nungsangwati, Mokokchung district Kisan Morcha tir – Tiayanger Jamir, 26 Aonglenden Mandal tir – Taliwati Pongen, Longsa Unit President – Pongenmeren aser Longsa Village Council nungi yimsüsür kati shilem agia jembia.

State pongu nung February 27 nü assembly by election agitsü

New Delhi, January 18 (Agencies): Bodhbarnü Election Commission of India (ECI)-i state pongu nung assembly menden trok atema by-elections agitsü sangdongogo.

Arunachal Pradesh, Jharkhand, West Bengal aser Tamil Nadu state tem nung assembly menden kaka aser Maharashtra nung assembly menden ana atema February 27 nü election agitsü. Kasa anogo nung Lakshadweep nunga Parliamentary constituency atema by election agitsü.

By election agiba votes ji March 2 nü zünga sangdongtsü, ta Bodhbarnü New Delhi nung osangbenertem senden ka nung Chief Election Commissioner-i metetdaksü .

Lakshadweep nung

Nationalist Congress Party (NCP) lenir, Mohammed Faizal MP menden nungi anentsüba ajanga by election agitsüsa akümer.

Arunachal Pradesh nung BJP lenir, Jambey Tashi asüba agi Lumla menden atema by election agitsüsa aküm aser Jharkhand nung Congress lenir, Mamta Devi anentsüba ajanga Ramgarh nung by election agitsüsa akümer.

Tamil Nadu nung Congress lenir, Thiru E Thirumahan Everaa asüba agi Erode (east) menden nung by election agitsüsa aküm aser West Bengal nung Trinamool Congress (TMC) lenir Subrata Saha asüba ajanga Sagardighi menden atema by election agitsüsa aküm.

Maharashtra nung BJP lenir ana- Mukta Shailesh Tilak aser

Laxman Pandurang Jagtap na asüba agi Kasba Peth aser Chinchwad menden na atema by election agitsüsa aküm.

Nomination file asütsü atema tatembangbuba anogoji February 7 asütsü, February 8 nü nomination papers reprangshitsü aser candidate temi tenüng agientsü atema tatembangbuba anogoji February 10 asütsü.

Iba dak alia Election Commission-isa Tripura nung assembly election February 16 nü agitsü aser Meghalaya o Nagaland na nung February 27 nü assembly election agitsü sangdongogo.

Nagaland, Meghalaya aser Tripura state tem nung assembly kümsük March 12, March 15 aser March 22 anogotem nung tembanger, ta EC-i metetdaksü.

Tir Murmu-i Delhi L-G VK Saxena nem ano tashi talila agütsüogo



New Delhi, January 18 (Agencies): Tang Delhi nung Chief Minister, Arvind Kejriwal aser Delhi Lieutenant Governor, Vinai Kumar Saxena na tsüngda tashi raktepba mapang nung linük Tir, Droupadi Murmu-i Delhi LG nem tashi tasen ana agütsüogo.

Industrial Relations Code, 2020 aser Occupational Safety, Health & Working Conditions Code, 2020 kübok tashi tasen agüja tang nungibo Lieutenant Governor-i Delhi

National Capital Territory nung aliba areas nung nüngdakba ozüngtem yanglutettsü.

January 16, 2023 nü Ministry of Home Affairs (MHA)-i sangdong balala ana ajanga iba osang ya metetdakja liasü.

Sangdong tasen ka magütsü tashi Lieutenant Governor-i item tashi amshitsü aser tim sorkar mesüra state sorkar indang mapatem inyaksü, ta MHA sangdong nung shia lir.

Union Territories pongu- Andaman & Nicobar Islands, Dadra and Nagar Haveli and Daman & Diu, Chandigarh, Puducherry aser Lakshadweep nunga administrators aser Lieutenant Governors nem item ama tashi agüja lir.

Linük temzüng nung Arrla 239 kübok Clause (1) nung ajemdaker Tiri item union territories nung administrator mesüra Lieutenant Governor-i Tir tazüokba nung inyaksü,

tashi amshitsü aser tim sorkar mesüra state sorkar mapatem inyaksü aser Union Territories nung aliba areas nung nüngdakba ozüngtem yanglutsü, ta MHA sangdong nung shia lir.

Industrial Relations Code, 2020 kübok tim sorkari public atema industrial establishment tasen mesüra class of establishments dang saru magütsü. Iba denji kasa Occupational Safety, Health, & Working Conditions Code, 2020 kübok state sorkar mesüra tim sorkar indang tashi balala item Union Territories trok nung administrator aser Lieutenant Governor nem agütsütsü.

Delhi Lieutenant Governor, Saxena aser Delhi Chief Minister, Arvind Kejriwal na tsüngda tashi raktepba mapang ka nung Tiri LG nem tashi tasen ana agütsü.

January 23, 2023 nü Municipal Corporation of Delhi (MCD) nung Mayor aser Deputy Mayor election

agitsü lia Saxena aser Kejriwal na tsüngda asentenshir tashi toktepa liasü. Aam Aadmi Party (AAP) tongti, Kejriwal-i, Lieutenant Governor-i nüburtemi shimtetba sorkar sendoker lenla ajak nung tetuyuba agütsür, ta aija liasü.

AO STUDENTS' CONFERENCE (AKM)

69th

General Conference 2023

AKHOYA

18th - 20th JANUARY

Theme
"Education in Praxis"

MORNING SESSION

January 19, 2023 Time : 10:00 AM

Special Guest
Shri Neiphu Rio
Hon'ble Chief Minister, Government of Nagaland

Chairperson : **Ms. Akumtita Jamir**

1. Scripture Reading & Prayer : **Mr. Toshi Sanglir**
Youth Promoter, ABAM

2. Special Song : Conference Choir

3. Presidential Address :

4. Greetings : a) **Mr. Kegwayhun Tep**
President, NSF
b) **Mr. Chingmak Chang**
President, ENSF

5. Exhortation : a) **Shri Metsubo Jamir**
Minister, Rural Development
Government of Nagaland
b) **Shri Chubawati Longchar**
President, Ao Sendon

6. Presentation of "AKM Educational Promotional Trust Award"

7. Special Song : **Mr. Imna Yaden**

8. Release of Souvenir :

9. Speech from Special Guest:

10. Benediction :

WORKSHOP SESSION

January 19, 2023 Time : 2:00 PM

Chairperson : **Mr. Imkongwati**
Former President, AKM

1. Scripture Reading & Prayer : **Rev. T. Lima Longkumer**
Pastor, Chuchuyimlang Baptist Church

2. Greetings : **Smti. S Arenia Longkumer**
President, Watsü Mungdang

3. Special Song : **MALT**

4. Exhortation : a) **Shri Sharingain Longkumer**
Speaker, NLA
b) **Shri Nokchasashi**
Deputy Commissioner, Tuensang

Workshop
Theme : "Education in Praxis"

Moderator : **Ms. Limasenia Jamir**

Speaker : a) **Er. Moa Aier**
Engineer-in-Chief Department of Power
b) **Er. Atoba**
Engineer & Technology Entrepreneur
Founder, Tabernacle - the Go-to-Software
for Churches.

Evening Session
AKHOYA STUDENTS' UNION

SBI State Bank of India
STRESSED ASSETS RECOVERY BRANCH, JORHAT
Na-Ali, M G Road, Jorhat, Opp. ASEB Building, PIN-785001 (Assam)
Tel No : 0376-2300193 / 2300204

[Rule - 8(1)] AGIADOKBA NOTICE

Securitisation & Reconstruction of Financial Assets and Enforcement of Security Interest Act, 2002 aser Arrla 13(12) nung ajemdaker, Security Interest (Enforcement) Rules 2002 nung Rule 3 den azüngtsü akok, tsünglanglen sign süa aliba State Bank of India nung tashi agüja aliba ketdangseri 11.10.2022 anogo nung Demand Notice ka ajanga sen apur, **Shri Y Vito Yephthomi, Proprietor of M/S. V General Shop** dang notice anguba anogo nungi tenzüka anogo 60 tsüngda notice nung shia aliba sen 37,40,660.00/- (Lakh semer tenet, meyrirjang lir, noklang trok ser roker) agüjang ta tuyua liasü. Sen apuri senji magütsütem nung sen apur/Guarantor aser public dang, tsünglanglen sign süa aliri iba Act kübok Arrla 13(4), **Rule 8** den azüngtsü akok, nung pa/la nem agüja aliba tashi nung ajemdaker 2023 kum January 16 nü yangi shia aliba kiojen agiadokogo, ta sangdonger. Talisa sen sen apur/Guarantor aser public dang iba kiojen shishilemba masütsü metetdaksür, aser shishilemba ibaji sen 37,40,660.00/- aser 12.10.2022 anogo nungi sen tetemlok den tanga ajakji State Bank of India meyong asütsü. Iba Act nung Arrla 13 kübok sub-section (8) nung ajemdaker sen apur dang iba kiojen alanzüksü atema mapang shidak nung inyaksü metetdaksü.

Kiojen osang tejangja
Naga colony, Burma Camp, Dimapur, Nagaland nung Shri Y Vito Yephthomi tenüng nung aliba Dag no- 698/2022, Patta no-1716 measuring & area 00B - 01K - 07L, Mouza no- 1, Block no-3 nung aliba kimong aser kiojen ajak.
Bounded : North tsütsü Approach Road lir,
South tsütsü Pangtong Phom kimong lir,
East tsütsü Yeveto kimong lir,
West tsütsü Approach Road lir.
DATE : 16.01.2023 AUTHORIZED Officer
PLACE : Dimapur (State Bank of India, SARB Jorhat Branch)

Himachal Pradesh nunga yim asem nung ki aika kaksadar

New Delhi, January 18 (Agencies): Tawa Uttarakhand state kübok Joshimath nung ali anenoka aiba den ki noklang aika kaksada tenzüka sülen tang Himachal Pradesh nunga yim asem nung ki aika kaksadar, ta osang ka ajanga metetdaksü.

Himachal Pradesh nung Mandi district kübok Nagani, Thalaut aser Faagu yimtsüngtem nung ki aika kaksaba agi yimdaklirtem tsübuteper.

Yimdaklirtemi ashiba agi, akhidang nungi item yimtsüng nung kodanga yamai matalokdang, ajüsüka tang yimdak kiojen kaksaba ya 2018-19 kum Kiratpur-Manali

highway nung four-lane project tenzüka ajanga asütsüa akok, ta metetdaksü. Iba project ya 2024 kum renemtsü.

Item yimtsüng asem nung Hindu nung tekülem ki asem aser ki 30 dak tema kaksaba sülen kibong karibo ki toktsür aienshiogo.

Ketdangsertem team asemi item yimtsüng semdangba sülen takoksa angurtem nem senotsü teyari agütsütsü, ta nangzükogo.

Nagani yimdak tantsür kati, "Four-lane highway mapa ajanga ozü ki mejungi raksaogo. Ozü tanur pongu lir, anungji ki toktsür aotsü kanga tasak," ta ashi.

Ano Faagu yimdak tantsür kati, "Akhidang nungi ni iba kidang lia arur, saka tangbo kü dang kidang nungi aienshiang ta tuyur. Ni yang nungi kechii aotsü," ta ashi.

Sorkar ketdangser kati, 2018 kum nungi iba timtem ajangshiba sülen survey-a agiogo saka iba report ji tang tashi magütsü, ta ashi.

Mandi District ADM, Ashwini Kumar-i, "Iba timtem ya 2018-19 sülen nungi tenzüka liasü. Tenemlen ali tuzükba ajanga kiojentem kaksaba. Onoki yim 10 nung survey agiogo aser scientist temia survey agiogo aser tang tashi report ji atadar," ta metetdaksü.



TIR YIMYIM YIMOBILEM (EDITORIAL)

DIMAPUR YANGTEPNÜ, AENJETI (JANUARY) 19, 2022

NE state 3 nung BJP tendangtsü

- P Tiamongba Aier

Election Commission of India (ECI)-i January 18 nü North East state asem- Tripura, Meghalaya aser Nagaland nung assembly elections agitsü anogotem metetdaksüogo. BJP atema North East state asem nung assembly elections ya kanga dang tongtipang tetendangba ka asütsü ama ajiteter. Tripura BJP state unit sasep nung telemsa adokogo aser iba ajanga yaküm Biplab Deb-i Chief Minister menden toktsütsüsa aküm. Külen, Tripura nung BJP den yariteper Indigenous People's Front of Tripura (IPFT) teloki Bodbarnü (January 18, 2023) Pradyot Kishore Deb Barma-i aniba Tipra Motha den longjemtsü osang metetdaksüogo. Iba ya Tripura nung BJP asoshi tebilemtsü khuret tulu ka asütsü. Maneni, Tripura nung Pradyot Kishore Deb Barma lenisüba jenjang kanga junga kümogo aser pa pusemer aika kümogo anungji BJP lennirtemi pa den tokteptsübaji tasak asütsü. Külen, Tripura nung taoba mapang sorkar ketdangsür CPM telokia Congress aser Tipra Mothaden longjemnüa mapa inyaka arudar. Tripura nung opposition teloktem longjemtsü merangba nung Trinamool Congress (TMC)-i dang tebang maiter aser menden 60 prong nung tokteptsü atema inyaka arur. Meghalaya nunga NPP-BJP teloktep sorkar asoshi tebilemtsü tulu ka ajuruogo aser ibaji Chief Minister Conrad Sangma-i January 12, 2023 nü taküm assembly elections nung National People's Party (NPP) kija dang tokteptsü osang sangoktsüba lir. Conrad Sangma-isa Uniform Civil Code (UCC) magizükba indang otioa metetdaksüogo anungji iba ajanga BJP tebilemba magizükba sayur. Anosa, BJP-i sorkar yimsü asüba Assam den Meghalaya-i arrtsü mangatetep tulu adoka lir aser yaküm November ita Assam Police-i Meghalaya nung civilian pungu kasetba ajanga tesentaktep raksaogo. Arrtsü ken o ya Nagaland aser Assam tsüngda adoka lir. Nagaland nung Nationalist Democratic Progressive Party (NDPP) aser BJP teloktep sorkar lir. Taoba Nagaland assembly elections nung NDPP aser BJP tsüngda menden 40:20 tangatetba nung lemsar toktepa sorkar aküm. Taküm assembly elections nunga menden kasa lemsar tokteptsü ta Bodbarnü Nagaland atema BJP state in-charge Nalin Kohli-i metetdaksüogo. Ajisüaka, Eastern Nagaland People's Organisation (ENPO)-i Frontier Nagaland ta ser state balaka meshia elections nunga shilem magitsü ayimokja lir, aser külen Naga nung kija aser telok aikati election magidang yimten latettsü ola adoker. 2018 assembly elections magidang BJP-i 'yimten latettsü atema election' ta ser toktepa takok angu saka sorkar kümsük tembanga aruaka yimten latettsü indang kecha mejembir. 2018 assembly elections agiba sülen nisungtemi state sorkar nunga BJP dena lir aser külen Centre nunga BJP-i aniba sorkar lir anungji BJP-i Naga yimten latettsü ta teimla tulu liasü, saka iba teimlaji amajok akümstsü ama lir, anungji taküm Nagaland assembly elections ya BJP atema tayongzükba tulu ka asütsü ama bilemer. Reprangdangra Tripura dak alaka Meghalaya aser Nagaland nung BJP-i tanga party tem den loktepa ajanga dang sorkar yimsü asür, anungji taküm Northeast state asem indang assembly elections ya BJP atema tetendangba tulu ka asütsü ama repranger.

OLEMSABANG

TANÜ PUTU NUNG KIDONG TELONGJEM TEINYAKTSÜ

(7th buba Longpok Semchir Telongjem Inti Mungdang, 12 January 2023, onük nung ajemdaker zülur)

~ Dr. M. Temjen Longkumer, Lerie Colony, Kohima

(Yashi adok nungi...)

- * Aki mapang nung mulungzüng agi tang jembia aru. Zülu nung yua maliasü. Tantsür tamburtem sümarbo tangazükdak malitsü. Süra kidong kati kechi inyaktsüla? Tanü ya lephsia reprangba aser züluyu (research & documentation) putu lir. Terenlok mapa (development) kar inyaktsü asünung, tamasa research agir inyaker. Anungji, otsüla/obola nung mapang nung koma liasü, research tejangja agir zülua doktsüra lanurtem asoshi tajangzük asütsü. Ano sabang balala (internet and social media) ajanga kidong ka sobaliba aser otsü angazükdaktsütsü akok.
- * Putu tensa den apet, sobalibajia melenshia aoer. Anungji, lipok otsü bushitepdang ak, nashi tuluba, sen aika chitepba yimya yabo majung ta bilemer. Kechiba süra, shisatsü (knowledge) arentsü mechi nung shisashirtemi shisamolü (academic research) balala agiteper. Anungji, metok meberi lira metongshitepba aser melenshitepba tajungba nung angatetepra ajak atema kanga ajungtsü.
- * Aki mapang nungbo yim-o-yim na tekolak bushitepba (headhunting) anemtepba liasü. Tanübo Kidong Telongjem-ji yim balala aika nungi atenshia akumer. Anungji, tanü putu nungbo yim ana meputepi lira kidong ka telongjem ajanga yim-o-yim na longjemdaktsütettsü akok.
- * Kinungtsüi la tenung züludang kinungbo kidong (title) züluba mesüra amshiba ya kanga meshidak ta bilemer. Tat. agi, kinungtsüji Jamir sernung Longkumer ta züluba. America nung, Hindu nung aser Naga kin karibo kinungbo kidong züluba/ amshiba angutsü. Aji par sobaliba dak apet amshir saka asen Aortembo sobaliba tajung lir. Anük, oko, temba, amo, ojanantsü, obatanubo, ajakji kidong tejangja bentetta ayuba agi dang tajayim shidakji jatet. Asen sobaliba tajung yur kechiba tangar jilo ayitsü. Tat. agi, ozü semchiri otsüla kechi kidong liasü ta asüngdang nung, Longkumer ta ashitsü asü? Ano asen sobaliba tajung kaji, tebur kati dangar yimtsür/kintsür ka agira tebuttsüji rapir kidong nungi tebu (father) ka yimdaktsür.
- * Asen Ao kin ya Tsüngrem akumtsübua aruba kin ka lir. Süng long kulemba putu nunga putir aser yimden yimsüsertemi anir nuburtemi kanga metsünga reta kulem-kuja liasü. Tanübo Khrista dak amangba putu lir. Anungji, Tsüngremi molungba nung ochishia Pa mezüng südaktsür inyakrabang, yimji yimjung aser temoatsü alitsü. Alima nung shisa dakasang Solomoni (Sayutsüngir 12: 13-14) ashi, "ajak angadangogo, Tsüngrem tsübuang aser Pa ozüng benshiang, kechiaser nisung teinyaktsü mapa ajak agi ojang. Kechiaser tajung süaka, tamajung süaka.....Tsüngremi mapa ajak o bendangtsü."
- * 7th buba Longpok Semchir Inti Mungdang nung Longpok dak jakzükba kidong tarensen (sub-clans) zülutenba osang kakat ajanga metetdaksüba yagi nuburtem talisa Longpok semchir/ lanurtem kibalembu tsütsü asüngtetta alitsü arangtetta yutsür. Kidong telongjem mungdang aliba mapang nung Pangzüng (Resolution) kechisa yanglutir itemji sangtongba agi nuburtem tajungba nung asüngsashidaktsür aser lokti lirumedema lidaktsütet.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Jericho anasa Aso 6buba nung aliba Byzantine Tenla ki ka angu



Israel nung West Bank kübok Jerichi yimti nung ngutetba Byzantine Tenla ki kimong aser atem noksa nung angur.

January 18, 2023: Israel nung West Bank kübok Jerichi yimti anasa Aso 6buba mapang nung aliba Byzantine Tenla ki ka ngutetogo, ta Bodhbarnü (January 18, 2023) Civil Administration indang Archaeological Unit-i metetdaksü.

Times of Israel osang ajanga ashiba agi, Tenla ki tasazükji square metre 250 lir aser iba Tenla ki ya akhidang yangluba Tenla ki tulutem rongnung ka asütsü.

Civil Administration-i ashiba agi, iba Tenla kiji Early Muslim Period mapang tashi nunga amshia liasü aser Islam

yimsü ajanga public kiojentem nung noksa balala sayaba memelayonga Tenla ki atem nung noksatemji tang tashi meraksai lir, ta metetdaksü.

Civil Administration-isa, Tenla ki temeket nungji marble aser bitumen lung tanak lir, aser itemji amshia Tenla kiji yanglua liasü. Akhidang nisungtemi item marble aser lungji kanga saaksaaka dang belenshi asütsüa akok, ta metetdaksü.

A.D. 749 küm nung menoknok lendong tesashi ka atalokdang region nung aliba Tenla ki aika raksa saka iba Tenla kijibo meraksai liasü.

Osang angazükba agi, Tenla ki aliba tesem nung ngutetbatemji West Bank kübok Ma'ale Adumim anasa aliba Good Samaritan Museum nung yur sayatsü.

Tejen Lai nung Yihusua leniba nung Israel nungertemi Jericho yimti amakba indang shia lir aser iba tesem ya Khristantem atema dang masü saka Yihuda nung aser Muslim nungertem atema-a kanga tongtibang tesem ka lir.

Israel nungertemi ozüing süngden bener Yihusua leniba nung Jericho yimti jara tenetben meketa alongba sülen yimti jaraji chirepa liasü.

Khristantemi India sorkar dang minorities kümzüksü mepishi

New Delhi, January 18 (Agencies): India kübok Jharkhand state nung tribal Khristantemi Centre sorkar dang state nung minorities temeden kümzüksü mepishio.

Jharkhand kidanger state, Chhattisgarh nung Khristantem amakba aser kiojen raksatsüba tatalokba kanga bulua akümba mapang Jharkhand state nunga tribal Khristantemi minorities kümzüksü mepishir.

January 15, 2023 nü Jharkhand yimtiba, Ranchi nung denomination balala nungi Khristantem adenshir Chhattisgarh nung Khristan adianutem pusema longkak ait, kechiyong tawa Chhattisgarh state kübok yimtsüing aika nung Khristantem jenshia lir aser Khristantem anema maneni inyaker.

Longkak aitertemi sobaliba sübotsü sübor ozülü balala amer longkak ait.

"Tamangba yimsü nung ajemdaker reshikangshiba anenang", "Amakba nungi Khristantem kümzükang" aser "Tamangba yimsü nung ajemdaker telemsa tadokdaksü", ta parnoki ozülü balala amer Ranchi nung

yimdong süa longkak aitogo. Iba sentong ya Jharkhand Christian Youth Association-i ayongzükba liasü.

Taoba mapang Jharkhand nung tribal advisory committee nung züngsem, Ratan Tirkey-i, Ato kilonser, Narendra Modi-i tangsa Chhattisgarh nung tensa azüoktsüla aser ozüing kübok aibelenertem pua temerenshi agütsütsüla, ta ashi.

"Congress-ia BJP-i inyakba ama inyaker," ta pai aitsü.

Tirkey-i, "Tesüiba küm ishika linük tesem balala nung Hindu nationalist temi Khristantem anema inyaker, ajisüaka tesüingmangtsü kaji-Congress-i küm pezü tashi yimsüsüba Chhattisgarh state nunga Khristantem anema inyaker," ta metetdaksü.

"Taoba mapang Hindu pusema Bharatiya Janata Party (BJP)-ia state nung tribal Khristantem anema inyaker. Ajisüaka secular party ta ajaba Congress-ia BJP-i inyakba amaji kasa inyaker. Yimtenren tsütsü tanemer party anapronglai minorities temeden mekümzukteter," ta pai aitsü.

Longkak aitertem den jembidang Ranchi nung tongti putir, Theodore Mascarenhas-

i, "Tanübo Khristantem anema inyaker, ajisüaka asüingbo Muslim nung mesüra lisopur akhi yimsü Sarna amangertem [tribals] anema inyaksüa akok. Anungji asenoki longjemer nokdaksüla," ta ashi.

Paisa, "Asen tamangba yimsü, chiyungba yimya mesüra süoshi süboba yimya shingaia ashitsütsü makok, kechiyong asen linük temzüng kübok senso ajak nem item temeden agüja lir," ta ashi.

National Christian Federation (NCF) Tir, Prabhakar Tirkey-i, Chhattisgarh nung Congress sorkari tangsa Narayanpur aser Kondagaon district na nung Khristantem anema inyakba ya nokdangtsüla," ta takhangba agütsü.

Kobi melii NCF-i Chief Minister Bhupesh Baghel densema ketdangsertem ajurua Khristantem kümzüksü atema mepishitsü, ta pai ashi.

Yaküm December 9 nungi tenzüka Chhattisgarh kübok Narayanpur aser Kondagaon district na nung nung aliba yimtsüing aika nung Khristantem amaker aser tribal Khristan 1,000 dak tema jenshia relief camps aser arem nung jenoka lir.

ANOGO ABEN TSÜNGREM DEN

Küm tasen tenem temejung

"Ita terbuba anogo mezüngbuba nung tenem temejung ngua adok"- Lipok 8:5

Iba tekong ya küm tasen asoshi tapet tekong ka lir. "Ita terbuba mezüng anogoji" asenok calendar nung January ita mezüng anogo lir. Iba anogo nung tenem temejung nembanga aliba angu! Tzüji arema alu. Tsüngremi maneni taochi sayu. Küm tasen nung mezüng anogo item tenem temejungtem jagi asenok den jembir. Küm tasen jagi asenok dangi kechi bener arutsü, tepela mesüra tejashi, takok mesüra tamakok, anema aliba mesüra shilu manem, tajung mesüra tamajung? Nembanga aliba ita temji tammang ali asü rem lanu aliba lenden ali asenoki angutsü makok. Aji saka asenok shidakba Khrista nung lia asenok Pa meyong küma lira asenok kecha ratamatsü mali. Tzüsü agi lungpanga aliba asüngtem nungji, tejangja tekümzükdak jelia yuja lir.

Tenem temejungtem nungji, Tsüngrem tenangzükbatem lir; "Tsüngrem jakla lemsatepertem kümtesstü" (1Peter 1:4) tenangzükba, Tsüngrem tatenba, tekümzükba, temoatsü, tarutsü anogotem ajak nung asenok den dena alitsü nangzük. Item sübanga aliba tenem temejungtemji "tenangzükbatem lir!"

Tenem temejung nungji tanelaren takok takoktsütem lir. Pa agizüker ajak nem asen Kibuba "takoktsü tashi agütsü" (Yn. 1:12, 42). Asenoki asen mulungjang ratamata nungi pilar ya shidi, "Khrista shibai ni tashi itdaksür Pa dak ni ajak inyaksü akok" (Fil. 4:13).

Tenem temejungtem nungji Khristan maongka lir- "Tebur aser Techir den telungjem akatsü maongka" (1Yn. 1:3); Tanela Temeshi-i agütsüba kotaker tepela, yimjung aser leniba; aser ano aika. Tenem temejungtem nungji tayongzükba sangwa jagi ka sangwatsür! Tesüiba tamakoktemji amadokang, Khrista dak tali amangtsü angazükba agi pei atema dang bilemba samadaksütsü, aser temeshiba agi iba küm tasen koktettsü telemteba kadi.

Idakji sentsüwangshi tenem kolak lir, asen Kibuba arutsü teimla. Mapang koda tammangba asür, iba teimla tesangwa akümer, memetetba asüngtem tatembangba temoatsü tenangzükba tali tejangjaba sangwatsür. Saka itemi metetang:

1. Tenem temejungtemji rong nungi, koba Kümtesstüba temaitsü lir, iba nungi angu. Pa nungi pilar alirtem iba tenem temejung tesangwaji mangutsü.

2. Itemji Ararat tenem kolak nungi angu, koba tetezü "temeshi li." Shidakba bendanga agütsüba temaba ochi mangdangji tejangja masütsü.

3. Itemji tanga tenem kolak nungi angu. Asenok saka tanela nung temaba jenjang nung alitsü. Kibubar nübur karbo teküboklen dang, ronglang nung tzü nungshiba ola dang angashia, rongjia aor asü masü memeteti dang alir. Rongji kümzuktetsü asü masü ta ratamata dang alir. Tekümtet tejangja memeteti tamang nung lukshishia alir. Iba jagi tepela tepsiter. Küm tasen ka arudang, rong jagi tuang! Tejangja tamang agi temaba jenjang nungi repringang. Tenem "temejungtemji repringang!"Anütsüing tenem temejung nung yaloktsü ama Pa taochitem adoker. Pa tamang katetba tenangzükbatem nung ranglokang.

ADVERTISEMENT

Impur Bible School nung tesayur mapa inyaksü atema temsüa alirtem agüja aliba Department nung apply asütsü jaoker.

Department:

1. Missiology (1 Post)
 2. Christian Ministry (Preferably Counselling) (1 Post)
- Qualification : M.Th from the Senate of Serampore College/University.
February 11, 2023 tashi nung application Executive Secretary, ABAM, Impur-798615, Mokochung, Nagaland address süa aser copy ka Secretary, Literature & Education Ministry, ABAM (Email: liteduabam@gmail.com) dangi tejangja Bio-data, contact number, Transcript and Certificates yoktsü.

Temsüa alirtem office ajanga personal interview agitsü.

Secretary
Literature & Education Ministry, ABAM
Impur, Nagaland

AO OSHI ANGAZÜKDAK:

TANÜ ANGAZÜKTSÜBA OJANG



Onük

(n) Omen nungi agizükba o kongsang (topic)

* Lanurtem asoshi **onük** ka agiteta sentong nung enok.

Onzük

(v) lung agi tsükdaksü (bring down by hitting with an object)

* Süngdong nung tanga aliba süngjang long agi **onzük**.

OLONG PAITEP # 6403

| | | | | | | | | |
|----|--|----|---|----|---|----|--|----|
| 1 | | 2 | | 3 | | 4 | | 5 |
| | | | | | | | | |
| | | | 6 | | 7 | | | |
| 8 | | | | | | | | |
| | | | | | 9 | | | |
| | | 10 | | | | | | |
| 11 | | | | | | | | 12 |
| | | | | 13 | | 14 | | |
| 15 | | | | | | | | |
| | | | | | | | | |
| 16 | | | | | | 17 | | |

TIPIEN

- 1. Nüji masü - (4)
- 3. Technütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 6402 TELANGZÜBA

LANGTSÜNGLEN :

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

TIPIEN :

- 1. Tesangra, 5. Mungo,
- 7. Kisen, 8. Salem, 12. Semki,
- 14. Kilem, 15. Kensü,
- 16. Sangpang.



AOLI YIM KA NUNG ELECTION YONGYA MEETING :

Party chairman: Asen candidate ba tonga aruogo, ajaki tepilemba ka khen ka khen ta shidangma.

Party worker : Joko election tonga aruoka candidate ba marudang tanüang arua he, tangarbo mapa tenzüka odar, taji asen party pura mapa tanzüka aotsü atema onoki group-wise list ka yanglur sen lakh ananabosa lemozükjaa alinungang mimong mesemtetja, yaa he listji.

Candidate : Ni menubaji asen state nung election agitsü magitsü mejangjaba agi dang maruteta, aser tanga mejangjaba, saka nenoki onsara yongyaba agi ni aruogo, Kwa listji ni repringdangdi...akakaka, asen yimdaksa lokti ya onsara ato...areee ka nung Mahela group ta ano ka nung Womentsür ta, ano ka nung Senior citizen group ta, ano ka nung Tsütemonger zünga ta, ano süngpur zünga denang Tzüdatsü pur group, ayaya mekaka, ni candidatebai a matitsüakoti, nomination anogo ano matongji ni electioni aitsü maitsü khen aroka pilemdangdi no, mekaka mekaka!

- Lilir : WhatsApp

Meghalaya assembly nung MLA 5 anener UDP nung aden



Shillong, January 18, 2023

(Agencies): Meghalaya nung party balala nungi MLA 5 tashi United Democratic Party (UDP) nung denogo.

MLA 5-i UDP nung madandang parnoki Meghalaya Speaker Metbah Lyngdoh nem MLA menden yutsüba shiditem agitsü.

MLA punguji Renikton Lyngdoh Tongkhar (HSPDP), Shitlang Pale (TMC), Mayralborn Syiem (suspended Congress MLA), Lambor Malngiang (Independednt) aser PT Sawkmie (suspended Congress MLA) nunger lir.

Meghalaya assembly nung tang Congress aser HSPDP indang

MLA ka danga mali kümogo. Bodbarnü Election Commission of India (ECI)-ia Meghalaya indang assembly elections agitsü anogo metetdaksüogo.

February 16 nü Meghalaya assembly elections indang polling agitsü aser March 2, 2023 nü votes azüngtsü.

Tripura nung BJP den yariteper IPFT-i Tipra Motha den longjemer

Agartala, January 18, 2023 (Agencies): Tripura nung BJP den yariteper Indigenous people's Front of Tripura (IPFT)-i Tipra Motha den longjemtsü telemtetba agiogo.

Tripura nung taküm February nung Assembly election agitsü lir.

"Tiprasa aser Tripuri nunger asoshi onoki Tipra Motha den longjemtsü telemtetba agiogo. Onok Guwahati nungi arur party züngsemtem aser executive

members den tebilemba lemsateptsü" ta Aghore Debbarma-i ashi.

"Onok takhangba kasa dang, onoki Constitution indang Arlla 2 aser 3 kübok sixth schedule nung adentsü akhanger. Iba ya onok indang nükjidong aser alizüng lir. Onoki kasa alizüng atema longjemer aser party züngsemtem den jembir sangoktsütsü" ta Aghore-isa ashi. "January 13 nü nai züluba shidi

ni nguogo. Tiprasa nunger liyonga aotsü aser asenoki Tipraland aser Greater Tipraland State atema inyaksü atema IPFT o TIPRA longjemtsü ashiba agizüker" ta IPFT president Prem Kumar Reang-i ashi.

Taoba mapang Tipra Chairman Motha Pradyot-i IPFT dang greater Tipraland ajangtettsü atema külemi longjemtsü shidi ka züluba liasü.

Meghalaya nung TMC tanishir Mamata-i nübortem ayongzük

Shillong, January 18, 2023

(Agencies): BJP ya tejak ana adenba telok ka lir. Parnoki elections mapang langka ka ashitsü aser elections tembangba sülen tanga ka inyaksü ta asür, ta West Bengal Chief Minister Mamata Banerjee-i ashi.

Meghalaya kübok North Garo Hills district nung senden

ka nung jembidang "Trinamool Congress ajanga dang Meghalaya nung sorkar ketdangsübaren tajung angutsü aser nübortem taginüba ataloktsü" ta Mamata-i ashi.

"BJP dak tejak ana keta lir. Parnoki elections mapang langka ka ashitsü aser iba sülen tanga ka ang inyaker.

Meghalaya nung February 27, 2023 nü polling asütsü.

"TMC ajanga dang sorkar ketdangsübaren ajangtsü kechiyong onoki dang lanurtem, tetsürtem, kaketshirtem aser aluyimertem taginüba tongtsür. Onoki Meghalaya nung nübortem indang sorkar ka kümnür" ta Mamata-isa metetdaksü

Lumla Assembly indang by-election Feb 27 nü agitsü

Itanagar, January 18, 2023

(Agencies): Arunachal Pradesh kübok Tawang district nung 1 Lumla Assembly menden indang by-election February 27, 2023 nü agitsü.

January 31 nü by-election indang gazette notification ka agütsütsü aser February 7, 2023 tashi nung nominations asütsü akok ta Chief Electoral Officer (CEO) in charge, Liken Koyu-i ashi.

February 8 nü paper repringtsü aser February 10 tashi nung tenüng agientsü akok. Iba sülen March 2, 2023 nü votes azüngtsü, ta paisa ashi.

By-election agitsü osang sangoktsüba ajanga Tawang district ajanga nung model code of conduct ka tenzüko.

CEO, Liken Koyu-i department ajak dang MCC akangakanga bentshitsu atema tetuyuba agitsüogo.

Lumla constituency nung vote enoktsür 9169 lir aser parnok rongnung tetsür 4712 dena lir. Iba constituency nung polling stations 33 lir.

Yaküm November ita MLA Jambey Tashi asüba ajanga Lumla menden tazüng aküm. Arishi küm 48 tain Tashi-i Lumla assembly constituency nung 2009 nungi kümsük asemen tashi MLA ka ama inyaka arua liasü.



INVESTMENT DEVELOPMENT AUTHORITY OF NAGALAND
Nagaland: Kohima - 797001



Dated, Kohima the 18th of January, 2023

ADVERTISEMENT

Interested candidates are hereby invited for the 3rdbatch for Skill Training program for 35 days at Unnati Skill Centre, Kohima with 100% assured Job placement across 30 centers in India under the joint project of CSR Education Initiatives

Training Venue : **Ground floor Capital Convention Centre**

Duration : **35 Days**

Eligibility : **Any**

Age : **18-27 years**

Training start date: **20th January 2023**

For more information and registration contact: 6385715853/7005697115

Ukraine interior minister helicopter ka nung tsükseta asü



Ukraine yimtiba Kyiv tezülen Brovary jila nung helicopter tsükokba tesem noksa nung angur. Ukraine National Police tekolakbai ashiba agi, helicopter tsükokba lendong nung nisung 14 asü, kong Ukraine interior minister aser tanur ana densema liasü. Paisa, asürtem rongnung parnok teku emergency services helicopter nung mener liasü, ta ashi.

Kyiv, Aenjeti/January 18

(Agencies): Ukraine indang interior minister aser tanur asem densema helicopter tsükokba lendong ka nung süogo. Iba helicopter ya Kyiv tezülen nursery ka anasa tsükoka liasü, ta emergency services-i metetdaksü.

Bodhbarnü iba lendong nung asürtem rongnung Interior minister Denys Monastyrsky, pa indang deputy Yevhen Yenin aser Ministry of Internal Affairs State Secretary Yurii Lubkovich nung densema liasü.

Helicopter ya Brovary jila nung kodaser tsükok iba indang osang tang tashi mejangjai lir.

State Emergency Service of Ukraine (SESU)-i ashiba agi, iba lendong nung nisung 14 süogo.

Kasa mapang nung tanurtem densema nisung aika yiruba osang angazükogo.

"Iba lendong atalokba mapang nursery nung tanur aser staff tem liasü," ta Kyiv region governor Oleksiy Kuleba-i Telegram nung zülutsü.

"Kindergarten nungi tanurtem ya tanga educational institution ka nung lir aser parnok atema jenjang tapet agidar," ta pai ashiba den emergency services tem lendong atalokba tesem nung inyaksangshidar.

Helicopter tsükokba indang video social media balala nung lemsatepba nung ki ka ronga aliba aser nüburttem asatepba angashiogo. Foil blanket tem nung aleper tasü mang aika nursery kima yua liasü aser iba temeket nung tayimtsü tajasa

mepitaka aliba nguogo.

Ukrainian presidential office, Deputy head Kyrylo Tymoshenko-i ashiba agi, iba helicopter ya Russia den rara nung tongtambang tesem kati oya liasü, ta ashiba den mapang tatsüka tsüngda osang tejangjaba agütsüsü ta ashi.

Ukraine indang prosecutor general, Andriy Kostin-i Telegram ajanga Ukraine Security Service-i bushisüng dang tenzükogo, ta ashi.

Kasa mapang nung Ukrain tir Volodymyr Zelenskyy-i, "tanü Brovary tesem nung lendong tamajung ka atalokogo. SES [State Emergency Service] helicopter ka tsükok aser tsükokba tesem nung mi adoka liasü. Mangyim jashi ya tebang agi ashitsü makoker," ta ashi.

MENUNGRA BILEMTETER

TEMIEM ASÜR IMKONG AO



19.01.2022

Temiem Oba,
Küm ka süiogo onoki na mamateter. Nü meim aser nü sayutsungi onok molungjang nung teti lir aser teti menungra belimer. Tanü iba anogo nung onoki ne akhüm tajung aser temoatsütem bilemteta Tsüngrem nem tenüngsang agüja amonger.
~ Temiem Kinungtsü, Chirnur & Kinungertem.

Gambian vice president Badara Alieu Joof süogo

Banjul, Aenjeti/January 18

(Agencies): Gambia Vice President Badara Alieu Joof mapang tatsüka shiranga liyar India nung süogo, ta tir Adama Barrow-i Bodhbarnü sangdong ka ajanga metetdaksü.

Arishi küm 65 tain Joof ya Gambia indang vice president mapa abentsü atema 2022 küm shima liasü. Pa taoba mapang 2017 küm nungi 2022 küm tashi education minister mapa bener liasü.

Barrow-i Twitter ajanga, Joof mapang tatsüka shiranga sülen süogo, ta metetdaksü, ajisüaka pai osang tejangja magütsü aser pa asüba anogo dena mesangdong.

Vice president ya temang anepalutsü atema hopta asem

tejakdang Gambia toktsür ao. Pa linük toktsür mao tsüngda ita aika yimjak nung shilem magi-i liasü.

Barrow-i 2016 küm otsüsüsüsa taoba tir Yahya Jammeh madak takok anguba sülen Joff ya pa kübok Vice president pezübuba aser tir-i 2021 küm election tanaben akokba sülen tanabuba Vice president liasü.

Badara Alieu Joof ya taoba mapang Gambian civil service nunga inyakogo aser iba sülen West and Central Africa atema Education Specialist ka ama World Bank nung inyak aser higher education, research, science and technology minister ka ama inyakba mapang pai pa tajangshibatem benoka inyaksangshia aruogo.

Pakistan nung ano Khan'er party-i aniba provincial assembly ka loksago

Islamabad, Aenjeti/January 18

(Agencies): Pakistan kübok Khyber Pakhtunkhwa provincial assembly loksago. Taoba Ato Kilonser Imran Khan-i national election takaratiba nung agitsü atema nongshiba mapang hopta ka tsüngda assembly anabuba loksago.

Khyber Pakhtunkhwa Angh Haji Ghulam Ali-i Bodhbarnü provincial assembly loksatsü atema shiti ka nung sign süa liasü.

Provincial chief minister, aser Khan'er party Pakistan Tahreek-e-Insaf (PTI) party nung lenir tejen Mahmood Khan-i mepeshiba dak ajemdaker pai iba jenjang agia liasü.

Honibarnü Pakistan nung nütünyongyong süük timtiba aliba province Punjab nung assembly loksaka liasü. PTI tekolakba Khan-i tetuyuba agütsüba sülen iba jenjang agia liasü. Khan ya taoba küm April ita PM mapa nungi anentsü aser pai election tangsa tang agitsü mesüra taküm October ita agitsü atema khanga arudar.

Pakistan temzüng ozüng kübok house-i interim sorkar ka mamenoktetra provincial legislature ka loksaba sülen ita asem tsüngda election tasen agitsüla ta shia lir.

federal aser provincial election mapa ka nung dang agia arur, saka temzüng ozüng ajanga election ya anogo balala nung agitsü atema temelaba agüja lir.

Linük nung assembly pezü aliba nungi ana loksaba ajanga general election tangsa tang agitsü atema Ato Kilonser Shehbaz Sharif-i aniba sorkar nongshitsü ta imlar.

"Onoki Khyber Pakhtunkhwa nung dang masü saka Pakistan ajanga nung two-thirds majority agi election akoktsü aser onok inyakyim dak ajemdaker sorkar kümteptsü," ta provincial chief minister Khan-i Mongolbarnü ashi.

PTI lenir Musarrat Jamshed Cheema-i Al Jazeera dang ashiba agi, sorkari parnok tejangraba nung dang inyaksangshi mesüi election takaratiba nung agitsüla.

"Khyber Pakhtunkhwa aser Punjab assembly loksaba sülen Pakistan shilem 70 dak tema provincial election nung tokteptsü. Parnoki kechiba general election agitsü atema atsüayonger? Election agitsü menoba ajanga parnok yimden yimsüsüba nung takoksa ajangshiba dang masü saka iba ajanga Pakistan nung tensa raksatsüsü," ta lai ashi.

Obendanger aser taoba mapang Mahmood Khan indang

adviser Saif Ali Khan-i, linük nung general election agitsü atema nungshitsü asoshi PTI-i assembly tem loksatsü asoshi telemtepta agia liasü, ta ashi.

"Linük yimsüsüba party temi onok inyakyim raksatsüsü meranger, kechiyong parnoki election takaratiba nung maginer. Onoki parnok tasa ajak ya yimden yimsüsüba aser temzüng ozüng dak ajemdaker raratsü," ta pai Al Jazeera dang ashi.

Lahore nung amendaker aliba political analyst Benazir Shah-i ashiba agi, Imran Khan-i election takaratiba nung agitsü asoshi ahangba ya pa nüburttem matsüngda kanga nungtugu akümba maongka agitsü asoshi lir.

"Khan-i province anaprongla aser talisa Punjab nung sorkar kümtepta, taruba general election nung pa jenjang kanga junga akümtsü," ta lai ashi.

Shah-i ashiba agi, ruling party tem atema iba mepetmesü bentettsü asoshi tanga lenmang aikabo mali aser Khan-i aginüba ama inyaksüsa akümtsü.

"Taruba ita asem tsüngda parnoki election atema nüboyimba sentong ka ayongzüka voter tem anidener Khan nem telanzüba ka agütsüsüsa akümtsü. Iba ya ruling party asoshi temela masütsü, kechiyong parnok tawa election nung tamakok ngua arudar aser parnok ya military-i anishiba reprangtetogo," ta laisa ashi.

PTI okatsür Khan-i ashiba agi, ruling alliance ya linük yimsü asütsü asoshi metemsü, kechiyong linük tang rongsenketzüng nung mepetmesü tulu adoker lir, koba taoba küm tzümetsüng lendong tulu adokba ajanga tamajungba kümdaktsüogo.

"Na bus nung mener senzüdang driver ya meshidak ta ngura bus tsükok matar saka driver takaratiba nung melentsü meranger. Onoki Pakistan nung iba ya aginer," ta pai ashi.

"Onoki ano ita ishika mataner, kechiyong iba mapang meyipa marutettsüsa mepetmesüi aitsü akok. Nüburttem nem telemtepta tasak agitsü asoshi telemtepta agidakjang," ta paisa ashi.



bener longkak aitba noksa nung angur. Longkak aiter temi election tangsa tang agitsü, Boluarte mapa nungi anentsü aser sorkari sota aliba taoba tir Pedro Castillo chiochtsü aser police den mangatettep adokba mapang asür par 48 atema ochi obendang akhanger.

Arequipa, Peru nung tir Dina Boluarte-i aniba sorkra aser Congress anema nüburttem aikati longkak aitba mapang longkak aiter kati "Resign Dina. Close Congress. He who raises his weapon against his people will be damned," ta zülua

Australian Open: Medvedev & Gauff nati takok angu; Nadal tsükogo



Aenjeti/January 18, 2023

(Agencies): Australian Open nung küm asem buba final tonga asayatsü asoshi meranga asayaba mapang Daniil Medvedev-i Bodhbarnü ashiba agi, iba asayamung nung maneni takok nguyonga aoba atema pelar.

Bodhbarnü Margaret Court Arena nung tanabuba round asaya nung pai 7-5, 6-2, 6-2 agi John Millman madak takok ngua tasembuba round-i iogo.

Seed tenetbuba nung aliba asayar ya 2021 küm decider nung Novak Djokovic-i tsükdaksü aser taoba küma final nung Nadal-i tsükdakja liasü.

Pa tasembuba round nung America nung asayar Sebastian Korda mesüra Japan nung asayar Yosuke Watanuki den asayatsü.

Medvedev ya Nadal den telok ka nung atar lir aser tena

quarter final nung ajuruteptsü liasü.

Russia nung asayar yagi mezüngbuba round nung game asem dang mekoki Marcos Giron madak takok ngua liasü.

Kasa asayamung tetsür kija asaya nung Coco Gauff-i Emma Raducanu madak takok nguogo. Bodhbarnü asaya nung Gauff-i 6-3, 7-6 (4) agi takok ngua liasü. Tena tang mezüngbuba asayar liasü.

Florida nungi arishi küm 18 tain asayar ya 2020 küm sülen tang mezüngbuba Melbourne Park nung tasembuba round-i iogo.

Arishi küm 20 tain Raducanu, shiba Britain tenüng nungi asayar, lai 2021 küm U.S. Open akokba sülen tang tashi nung Grand Slam asayamung nung tanabuba round adena asayadanga mali.

Raducanu shiba tang jenjang

77buba nung lir, la tetsüng yiruba ajanga sadema masayateti arudar.

Australian Open tebur kija asaya nung Rafael Nadal, Bodhbarnü tanabuba round nung World No. 65 Mackenzie McDonald mekoki tsükogo. Tena tsüngda asaya ya McDonald-i 4-6, 4-6, 5-7 agi koka liasü.

Spain nung asayar yagi asaya tetenzük nungi junga masayatet aser pai mezüngbuba set nung first serves 65% dang otet aser groundstroke dena junga masayateti liasü. Tanabuba set teyonglen break ka agi McDonald tesülen aliba mapang Nadal hip yirua liasü.

4-6, 3-5 ta asaya mekoki aliba mapang Nadal temang anepalutsü atema asaya anena ata aser mapang talangka temang anepaluba sülen asaya tenzükshi saka pai junga masayatet.

ODI rankings: Virat Kohli top-five-i iogo

Aenjeti/January 18, 2023

(Agencies): Bodhbarnü sayaba ICC ODI rankings nung taoba India captain Virat Kohli jenjang ana tejakdangi tua top-five-i iogo.

Kohli küm asem junganüa junga masayateti arur tawa kanga junga asaya tenzükogo aser pai Sri Lanka den ODI asem asayaba mapang century ana yanglua ajak senteper run 283 yangluba sülen tang iba jenjang ajangzükogo.

Kohli-i tang point 750 nguteta lir aser pai tanabuba jenjang nung aliba asayar Rassic van der Dussen (766) aser tasembuba nung alisang Quinton de Kock (759) na temeneper dang lir. ODI ranking nung Pakistan captain Babar Azam (887 point) maneni temaba jenjang nung lir.

New Zealand den ODI asayamung nung asayaba mapang jenjang yangushitsü atema Kohli asoshi maongka peria lir.

India team nung Kohli den

külem asayar Shubman Gill, Mohammed Siraj aser Kuldeep Yadav nungera ranking nung tejakdangi tuogo. Gill shibai Sri Lanka den asayaba mapang mezüngbuba ODI century züka liasü pa jenjang 10 tejakdangi tua tang 26buba nung lir. India team nungi opener yagi iba asayamung nung run 207 yanglua liasü.

Siraj, shiba India-i 3-0 agi Sri Lanka akokba asayamung nung wicket timtiba agiba asayar liasü, pa ODI bowler tem rongnung jenjang 15 tejakdangi tua tang tasembuba nung lir. Pai iba asayamung nung wicket teku agia liasü. Iba asayamung nung kanga junga shilem agiba ajanga Siraj-i point 685 angu aser Trent Boult (730) aser Josh Hazlewood (727) na meneptsü ana nung lir.

Kasa mapang nung Sri Lanka den asayaba mapang asaya ana nung wicket pongu agiba sülen Kuldeep Yadav jenjang tenet tejakdangi tua tang bowler tem ranking nung 21buba nung lir.

Gill ODI nung run 1000 takaratiba yangluba asayar kümogo



New Delhi, Aenjeti/January 18

(Agencies): India nung lanur asayatem rongnungi kanga dang sempet tajung aketba asayar Shubman Gill-i Bodhbarnü otsü tasen ka yaglua pa India nung asayatem rongnungi ODI asaya nung run 1000 takaratiba yangluba asayar kümogo.

Bodhbarnü New Zealand den Rajiv Gandhi International Stadium, Hyderabad nung mezüngbuba ODI asayaba mapang pai iba alizüng tongteta liasü.

Gill, shibai anogo pezü tsüngdang century ana yanglua liasü, pai asaya 19 nung iba alizüng tongteta Virat Kohli aser Shikhar Dhawan nati asaya 24 nung run 1000 yanglua otsü tasen yanglur aliba ajatetogo.

Pakistan nung asayar

Fakhar Zaman-i asaya 18 nung run 1000 yanglur aliba sülen Gill ya Imam-ul-Haq den tanabuba jenjang nung lir.

Gill, shibai Deobarnü Sri Lanka den asayaba mapang century yanglua liasü, pai New Zealand den mezüngbuba asaya nunga ball 87 nung century yanglua liasü. Iba asaya nung pai boundary 14 aser six ana züka liasü.

2022 küm nung tang tashi nung alima nung asayar ajak rongnung Babar Azam sülen Gill-i ODI nung run timtiba yanglur lir.

Gill, shibai Zimbabwe den asayaba mapang mezüngbuba century yanglua liasü, pa ya ODI asaya nung India nung asayatem rongnungi average 60 dak tema aser strike rate 100 dak tema aliba asayar lir.

Wrestler temi WFI tir anema longkak ait



New Delhi, Aenjeti/January 18

(Agencies): Mimlai aliba mapang ka nung Tokyo Olympics bronze medallist Bajrang Punia aser world championship medallist Vinesh Phogat na densema India nung nungtuwu wrestler temi national federation tir Brij Bhushan Sharan Singh inyakyim anema Bodhbarnü longkak aita liasü.

Wrestler temi parnok kechi agi temulung masü mesüra parnok takhangba kechi, iba indang osang tejangja magütsü, saka ashiba agi, Singh-i Wrestling Federation of India (WFI) aniba yimya agi parnok laktetogo ta ashi. Singh ya Kaiserganj nungi BJPMP ka lir.

Jantar Mantar nung adenshia longkak aitba wrestler 30

rongnung Bajrang, Vinesh, Rio Olympics medallist Sakshi Malik, world championship medallist Sarita Mor, Sangeeta Phogat, Satyawart Malik, Jitender Kinha aser CWG medallist Sumit Malik nung densema liasü.

"Onok rara ya sorkar mesüra Sports Authority of India (SAI) anema masü. Iba ya WFI anema lir. Onoki mapang tatsüka tsüngda nung osang tejangjaba agütsü. Onoki tatem tashi raratsü," ta Bajrang Punia-i PTI dang ashi.

Bajrang indang support staff tem rongnung coach Sujeet Mann aser physio Anand Dubey na densema iba longkak aitba sentong nung shilem agia liasü.

"Iba dictatorship ya

magizüksü," ta tanga wrestler kati ashi.

Singh-i WFI tir mapa ya 2011 küm nungi abener. Pa ya 2019 February ita WFI tir mapa abentsü atema tasembububa shima liasü.

"Asayartemi linük atema medal bener arutsütsü asoshi takokba tashi inyaker, saka federation-i onok jenjang ajemshidaksüba dak alaka kecha minyaker. Asayartem reshikangshitsü atema temzüng ozüngtem yanglur," ta Sakshi-i tweet asü.

Anshu Malik, Sangeeta Phogat nungeria twitter ajanga parnok tebilemba lemsatepogo aser PMO, Prime Minister Narendra Modi aser Home Minister Amit Shah nung ajak tag süja liasü.

BILEMDANGANG

"Temotsü mezüngdangra teti temulung masü dang alitsü."